

Kibrando e mito y balorando un criatura misterioso

Awe ta Dia Mundial di Colebra



DIA 16 di juli ta celebra Dia Mundial di Colebra, un fecha dedica pa eleva conscientisacion tocante e balor inmenso di un especie animal cu hopi biaha ta wordo temi, pero cu, sinembargo, ta intriga y cautiva esnan cu ta apasiona pa descubri e misterio y magia cu e criatura enigmatico y exotico aki ta encera.

Kico nos sa di colebra?

Colebra ta bestianan di e famia di reptil cu ta mostra caracteristicanan fisico hopi particular. Nan tin un curpa hopi largo, sin pia y pa move nan mes nan ta lastra cu movecionnan ondulante lateral. Nan curpa ta cubri cu scama y paden nan tin vertebra.

Nan ta bestianan carnivoru cu ta alimenta principalmente door di jaag riba otro especienan animal, uzando sea e mecanismo di constriccion (troce) of inyectando veneno pa medio di nan mordi.

Colebra na Aruba: Un bista mas cerca

Na Aruba, nos tin nos propio especienan di colebra cu ta hunga un rol importante den nos ecosistema local. E mas comun ta e Santanero (Aruban Racer), un colebra no-venenoso y no-peligroso pa hende. E Santanero ta un gran aliado den e ambiente natural di Aruba, comiendo insecto y roedornan chikito cu por ta un molester pa hende. E ta un ehempel cla di con colebra por coexisti pacificamente cu nos.

Otro especie importante y unico ta e Cascabel (*Crotalus unicolor*), tambe conoci como colebra di Aruba. Esaki ta un especie endemico, cual kieren cu e ta existi solamente aki na Aruba y ningun otro caminda na mundo. E Cascabel ta un colebra venenoso, pero e ta hopi timido y ta prefera di keda leu for di hende. Atakenan ta hopi raro y ta tuma luga solamente ora e colebra ta sinti su mes menasa. E ta un especie estrictamente protehi tanto na Aruba como internacionalmente y esfuersonan di conservacion ta esencial pa su sobrevivencia.

Algun colebra mas conoci na mundo

Tin un gran variedad di colebra rond mundo, pero esnan mas conoci pa nan tamaño, rareza y beyesa ta inclui:

- Cobra Real
- Piton Reticulada
- Anaconda Berde
- Boa Constrictor
- Piton Diamantina
- Cascabel Mudo
- Mamba di Jameson
- Piton Amatista Australiano
- Colebra di Coral Blauw

Mito y berdad tocante colebra

Hopi mito a wordo crea rond di e bunita y enigmatico animal aki y cada pais tin su propio conotacion y creencia.

Sinembargo, esnan mas conoci y popular ta:

- Un di e mitonan mas conoci ta e creencia cu carni di cascabel por cura cierto malesa, incluyendo cancer. Sinembargo, esaki no a wordo demostra científicamente.
- Otro creencia ta cu colebra ta pica cu nan lenga. Esaki ta totalmente robes! Colebra ta inyecta veneno den nan victimanan pa medio di nan djente, cu ta manera hangua fini, perfectamente diseña pa ataca nan prooi.
- Hopi hende ta afirma cu colebra no por mira, pero nan vision nocturno ta hopi miho cu di otro animal.
- Colebra no ta ataca hende; al contrario, nan ta criaturanan cu ta prefera di keda leu, ya cu nan ta mira hende como un depredador. Nan ta ataca solamente den forma defensivo ora nan ta sinti nan mes den peligro.
- Como reptil, hopi hende ta pensa cu tur colebra ta pone webo, pero tin algun especie cu ta duna luz na nan yiunan bibo.
- Un mito hopi popular ta chupa e herida ora un persona wordo morde pa un colebra. Esaki por ta contraproducente y hasta peligroso, causando cu e veneno por plama mas lihe pa otro areanan di curpa, si tin un herida of sangramento den boca.

Importancia di colebra den e balansa ecologico

Colebra tin un gran balor den e balansa natural, ya cu nan ta encarga cu control di proliferacion di otro especienan mas chikito, manera raton, djaca y hopi otro roedor. Esaki ta yuda pa sembra y cosechanan no wordo destrui y, na mes momento, ta preveni aparicion di malesa y plaga cu por afecta salud di hende.

Ademas, nan ta e sustento di otro especienan cu ta habita den naturalesa, manera algun parha di jaag y animalnan depredador manera especienan felino. Esaki, sin duda, ta permiti cu tin un balansa ecologico riba nos planeta.

Pa e motibo aki, ta necesario cuida y proteha colebra, ya cu ta conoci cu hende ta jacht riba nan solamente pa obtene ganashi, sea pa medio di benta di nan cuero of pa wordo uza den mundo di gastronomia como un plato exotico, principalmente den paisnan di Asia.

Con pa celebra Dia Mundial di Colebra?

Pa celebra Dia Mundial di Colebra, ta basta pa nos tur, individualmente of colectivamente, siña balora, cuida, respeta y proteha un especie animal cu ta brinda gran beneficionan na henter humanidad.

Danki na nan presencia den naturalesa, por logra un berdadero balansa ecologico. Ademas, ta necesario pa laga un banda tanto mito y creencia cu colebra ta bestianan peligroso, cu mester wordo teme y mata. Esaki ta specialmente importante pa nos especienan local, e Santanero y e Cascabel, cu ta forma parti di e biodiversidad unico di Aruba. Ta necesario pa nos wak nan como criaturanan cu, manera cualkier otro especie, ta uza nan sentido di sobrevivencia pa no perece.

Si bo kier forma parti di e celebracion aki, anto nos ta invita bo pa cuminsa for di awe cambia bo concepcion tocante colebra y bira parti di un campaña pa evita cu nan ta keda wordo gejaag y mata di manera indiscrimina y sin ningun tipo di compasion, pasobra di lo contrario, nan lo caba di disparce manera otro especienan valioso cu no ta habita mas riba e planeta.